

舍利弗問經所記結集

林崇安編

(內觀雜誌，47期，pp.20-27，2006.12)

說明：

《舍利弗問經》一卷 (T24, No. 1465)，屬大眾律 (摩訶僧祇律) 之一重要記載。今將全文依次標號，以便掌握段落。重要內容：

- 【1】本論段落 (8)，指責「有一長老比丘 (指耶舍) 好於名聞，亟立諍論，開張增廣迦葉所結名曰大眾律，外採綜所遺，誑諸始學，別爲群黨。」此是第二結集時，會外大眾對耶舍長老之批評也。
- 【2】本論段落 (12)，強調「摩訶僧祇其味純正」。
- 【3】段落 (7) 與 (9) 二者，是後期插入說有部的傳承與部派分立的傳說，應移出本論，其中部派的分立是依據說有部世友的主張。
- 【4】本論段落 (28)，指出：「邪導師者，雖讀眾經，以邪事業，矯製邪科，出邪諂法誑惑凡人，以求敬仰；非人所知，說云我知；非人所得，說云我得。或人難曰：那知那得？答曰：空界天神幽中知識，密以語我。或云：某年某月有利有害，逆相開示，應防應救，此滅彼興，我得汝失。」指出邪導師之欺誑世人，值得注意。

舍利弗問經 (全)

- (1) 如是我聞：
- (2) 一時，佛住羅閱祇音樂樹下，與大比丘眾一千二百五十人俱，名聞十方，結盡解脫；八部鬼神等願聞法要。
- (3) 舍利弗從座而起，前白佛言：世尊！佛是法王，隨眾生欲，散說法教，令諸天人恭敬奉持，或聞傳聞，或行不行，云何名行法者？云何名不行法者？
- (4) 佛言：善哉善哉！汝能爲諸眾生，作如是問，諦聽！諦聽！吾爲汝說。
夫行法者，有聞而持，有傳聞而持，皆名曰僧，如寶事比丘，聞佛

所說「諸行無常」，即觀生滅，斷諸有漏，真吾弟子，是行法者；其傳聞者，如「觀身」，比丘聞汝說、迦留陀夷說：「飲酒者開放逸門，於行道者作大留難」，即入無諍三昧，得見道斷集。行我法者不行非法；行非法者是名不行，是非法人，非吾弟子，入邪見稠林。

- (5) 舍利弗白佛言：云何世尊，為諸比丘所說戒律，或開或閉？如為忽起長者設供，斷諸比丘不聽朝食？如為社人請，復聽食飯米*(戍+又)魚肉？如為頻富村人請，復不聽食飯但食薄粥？如為頻婆娑羅王請，復聽飽食飯食？如為闍陀師利請，復聽多家數數食，皆不得飽？諸如此語，後世比丘、比丘尼、優婆塞、優婆夷，云何奉持？
- (6) 佛言：如我言者，是名隨時，在此時中應行此語；在彼時中應行彼語，以利行故皆應奉持。
- (7) 我尋泥洹，大迦葉等當共分別，為比丘、比丘尼作大依止，如我不異。迦葉傳付阿難，阿難復付末田地，末田地復付舍那婆私，舍那婆私傳付優波笈多。

優波笈多後，有孔雀輸柯王，世弘經律，其孫名曰弗沙蜜多羅，嗣正王位，顧問群臣：云何令我名事不滅？時有臣言：唯有二事，何等為二？猶如先王造八萬四千塔，捨傾國物供養三寶，此其一也；若其不爾，便應反之，毀塔滅法，殘害息心四眾，此其二也。名雖好惡俱不朽也。

王曰：我無威德以及先王，當建次業以成名行。

即御四兵攻雞雀寺，寺有二石師子，哮吼動地。

王大驚怖，退走入城，人民看者嗟泣盈路，王益忿怒，自不敢入，驅逼兵將，乍行死害，督令勤與，呼攝七眾：比丘、比丘尼、沙彌、沙彌尼、式叉摩尼，出家、出家尼一切集會。

問曰：壞塔好不？壞房好不？

僉曰：願皆勿壞，如不得已，壞房可耳。

王大忿厲曰：云何不可？

因遂害之，無問少長，血流成川，壞諸寺塔八百餘所。諸清信士，舉聲號叫，悲哭懊惱。王取囚繫，加其鞭罰。五百羅漢登南山獲免，山谷隱險，軍甲不能至故。王恐不洗，賞募諸國，若得一首即償金錢三千。

君徒鉢歎阿羅漢及佛所囑累流通人，化作無量人，捉無量比丘、比

丘尼頭，處處受金。王諸庫藏，一切空竭。

王益忿怒，君徒鉢歎現身入滅盡定。王自加害，定力所持，初無傷損。次燒經臺，火始就然，颯炎及經，彌勒菩薩以神通力，接我經律上兜率天。

次至牙齒塔，塔神曰：有蟲行神，先索我女，我薄不與，今誓令護法！以女與之，使至心伏。蟲行神喜，手捧大山用以壓王及四兵眾，一時皆死。王家子孫於斯都盡。

其後有王，性甚良善，彌勒菩薩化作三百童子，下於人間以求佛道，從五百羅漢諮受法教，國土男女復共出家，如是比丘、比丘尼還復滋繁。羅漢上天，接取經律還於人間。

時有比丘名曰總聞，諮諸羅漢及與國王，分我經律多立臺館，為求學來難。

(8) 時，有一長老比丘好於名聞，亟立諍論，抄治我律，開張增廣迦葉所結名曰大眾律，外採綜所遺，誑諸始學，別為群黨，互言是非。時有比丘，求王判決。王集二部，行黑白籌，宣令眾曰：若樂舊律可取黑籌，若樂新律可取白籌。

時取黑者乃有萬數，時取白者只有百數。王以皆為佛說，好樂不同不得共處。學舊者多從以為名為摩訶僧祇也，學新者少而是上座，從上座為名，為他俾羅也。

(9a) 他俾羅部（註：上座部），我去世時三百年中，因於諍故，復起薩婆多部（註：說有部）及犢子部。

(9b) 於犢子部，復生曇摩尉多別迦部（註：法上部）、跋陀羅耶尼部（註：賢胃部）、沙摩帝部（註：正量部）、沙那利迦部（註：密林山部）。

(9c) 其薩婆多部，復生彌沙塞部（註：化地部）；目捷羅優婆提舍，起曇無屈多迦部（註：法藏部）、蘇婆利師部（註：善歲部）。

(9d) 他俾羅部，復生迦葉維部（註：飲光部）、修多蘭婆提那部（註：經量部），四百年中，更生僧伽蘭提迦部（註：說轉部）。

(9e) 摩訶僧祇部（註：大眾部），我滅度時二百年中，因於異論生，起鞞婆訶羅部（註：一說部）、盧迦尉多羅部（註：說出世部）、拘拘羅部（註：雞胤部）、婆收婁多柯部（註：多聞部）、鉢蠟若帝婆耶那部（註：說假部）。三百年中，因諸異學，於此五部，復生摩

訶提婆部(註：大天部)、質多羅部(註：制多山部)、末多利部(註：北山住部)。

(10) 如是眾多，久後流傳，若是若非，唯餘五部，各舉所長，名其服色。

摩訶僧祇部：勤學眾經，宣講真義，以處本居中，應著黃衣。

曇無屈多迦部：通達理味，開導利益，表發殊勝，應著赤衣。

薩婆多部：博通敏達，以導法化，應著皂衣。

迦葉維部：精勤勇猛，攝護眾生，應著木蘭衣。

彌沙塞部：禪思入微，究暢幽密，應著青衣。

是故，羅旬踰比丘分衛，不能得食，後以五種律衣更互而著，便大得食，何以故？是其前世執性多慳，見沙門來，急閉門戶云：大人不在。見他布施，歡喜攝念，發心願作沙門。是故今身雖得出家窮弊如此。我法出家，純服弊帛及死人衣，因羅旬踰故，受種種衣也。

(11) 舍利弗言：如來正法，云何少時分散如是？既失本味云何奉持？

(12) 佛言：摩訶僧祇其味純正，其餘部中，如被添甘露，諸天飲之，但飲甘露，棄於水去；人間飲之，水露俱進，或時消疾或時結病，其讀誦者亦復如是，多智慧人能取能捨，諸愚癡人不能分別。

(13) 舍利弗言：如來先云：若寒國土，聽諸比丘身著俗服及覆頭首，迦那比丘行大林聚落，值天大寒鳥獸死盡，村人與其俗衣，世尊令其懺悔何耶？

(14) 佛言：聽著染色置在衣裏耳！

(15) 舍利弗言：云何世尊常言：諸比丘不得以鉢布地，當擊以淨物，若無淨物，當以草葉木葉，君輸柯比丘與其眷屬受日難王請，行淨板擊鉢，云何世尊而罵之言：是惡魔行、非行法者？

(16) [佛]言：以清淨物不受染，若淨無者，乃用草木之葉，一用即棄，不得用木皮木肉，以其體中本有膠故，若膠若漆，以受塵故。若已枯燥，本是有故，濕熱更流故。

(17) 舍利弗白佛言：世尊！云何聽諸比丘受施主請食及僧家常食？云何蘭若提比丘受無畏長者請食，如來罵云：是土木人，不應食人食也？

(18) 佛言：以破壞威儀，行食之時，但以眼視不以手受，外道梵志尙知受取，況我弟子而不受食，何況於食！一切諸物不得不受，唯除

- 生寶及施女人。若作法者，猶應授與體上之衣，若貯金器受則判施。
- (19) 舍利弗白佛言：云何世尊說遮道法不得飲酒，如葶藶子，是名破戒開放逸門？云何迦蘭陀竹園精舍，有一比丘疾病，經年危篤將死，時優波離問言：汝須何藥，我為汝覓，天上人間乃至十方，是所應用我皆為取。答曰：我所須藥是違毘尼，故我不覓以至於此，寧盡身命無容犯律。優波離言：汝藥是何？答曰：師言須酒五升。優波離曰：若為病開如來所許。為乞得酒，服已消差。差已懷慚，猶謂犯律，往至佛所懇懃悔過。佛為說法，聞已歡喜，得羅漢道。
- (20) 佛言：酒有多失開放逸門，飲如葶藶子，犯罪已積，若消病若非先所斷。
- (21) 舍利弗又白佛言：云何如來常言：不得殺眾生乃至蟻子，而以臘月八日，於舍衛國長水河邊，與輸麗外道掙術，先逼以神通力令墮負處，其生慚羞投水自盡，眼視沈沒而不拯救，不亦殺乎！方復告眾言：輸麗持此惡法惑亂眾生，前世善熟，滅此惡身，轉生善見，不亦快乎！我諸弟子，當於此日設清淨浴洗，澆身垢念，除倒見身，若清淨心亦清淨，似結使人無有慈悲？
- (22) 佛言：大智！汝能為諸未通達者，問斯誠要。輸麗外道於無量世中積習邪見，誓障正法，往昔燈明佛時，我行菩薩道，遇一村落，人多癘病，死者縱橫，我採眾藥隨宜救濟皆得除愈，其中一人名曰不戴(吳音)，是梵志學，自負多能，不肯信服，臨欲終時方復求我，我語之云：汝先可治與藥不取，今將氣盡方復有求，如汝即時非藥能治。不戴曰：我今不能復判優劣，願未來世共決勝負，我若負者當殺身，求生為汝弟子，汝若不如為我走使。時我報云：善哉善哉！故今生此土與我相值，臨終善熟，共契所會，發言失據，恥其眷屬，投水自害。身雖死亡，心發善故，生我法中，有勝進故我不救也。
- (23) 舍利弗言：云何於訓戒中，令弟子偏袒右肩？又為迦葉村人說城喻經云：我諸弟子當正被袈裟，俱覆兩肩，勿露肌肉，使上下齊平，現福田相，行步庠序，又言：勿現胸臆。於此二言云何奉持？
- (24) 佛言：修供養時，應須偏袒，以便作事。作福田時，應覆兩肩，現田文相。云何修供養？如見佛時、問訊師僧時，應隨事相。若拂床，若掃地，若卷衣裳，若周正薦席，若泥地作華，若擡高足下，若灑若移種種供養。云何作福田時？國王請食，入里乞食，坐禪誦

經，巡行樹下，人見端嚴有可觀也。

(25) 舍利弗復白佛言：世尊！八部鬼神以何因緣生於惡道，而常聞正法？

(26) 佛言：以二種業，一以惡故生於惡道，二以善故多受快樂。

(27) 又問：善惡二異可得同耶？

(28) 佛言：亦可得耳，是以八部鬼神，皆曰人非人也。

天神者，其之先身，以車輿舍宅飲食，供養三寶、父母、賢勝之人，猶懷慳儉、諂嫉、妒者，故受天神身，如普光淨勝天神等。

虛空龍神者，修建德本，廣行檀波羅蜜，不依正念，急性好瞋，故受人非人身，如摩尼光龍王等。

夜叉神者，好大布施，或先損害，後加饒益，隨功勝負，故在天上空中地下。

乾闥婆者，前生亦少瞋恚，常好布施，以青蓮自嚴，作眾伎樂，今爲此神，常爲諸天奏諸伎樂。

阿修羅神者，志強，不隨善友所作淨福，好逐幻僞之人，作諸邪福，傍於邪師，甚好布施，又樂觀他鬥訟，故受今身。

迦婁羅神者，先修大捨，常有高心，以俊於物，故受今身。

緊那羅神者，昔好勸人發菩提心，未正其志逐諸邪行，故得今身。

摩[目*侯]羅伽神者，布施護法性好瞋恚，故受今身。

人、非人等，皆由依附邪師，行諂惡道，以邪亂正，俱謂是道，以自建立。

夫出世道者，不雜魔邪諂悅之語。

諂悅之語非出生死，是入惡道。諂悅邪人所可言說，大觀似道，細則眩鑠。

當依正法及行正法者，當得佛、法、僧、力、解脫、無爲。

若依相似法，依行邪導師，繫縛生死，永淪惡趣，是無知人，非求出世，入邪見網。

邪導師者，雖讀眾經，以邪事業，矯製邪科，出邪諂法誑惑凡人，以求敬仰；非人所知，說云我知；非人所得，說云我得。

或人難曰：那知那得？

答曰：空界天神幽中知識，密以語我。或云：某年某月有利有害，逆相開示，應防應救，此滅彼興，我得汝失。

如是欺誑薄俗之人。不能深思德本，隨逐邪末，失其正見，興造邪業，生顧錢帛，死入惡道，拔舌吞銅百千萬歲，後作畜生亦無量歲，復生爲鬼，或在山林曠野河海舍宅，益懷諂誑無有休息，或迷謗行人使失道徑，或示語邪巫言，先亡形服恐動百端，甚可惡賤，求人飲食，無有終極。

值我弟子心懷正直不失正念者，聞即呵叱，終敢復爲？

若我弟子心懷怯弱易失心者，從其求免，踰得其便，千端萬緒求索無厭。

如是之人，無丈夫相，爲邪所動，死墮惡趣，甚可悲念。

- (29) 舍利弗復白佛言：八部鬼神，依空爲空神，依地爲地神耶？
- (30) 佛言：別有地神，如淨華光等，過去世時，好修布施，多瞋、難滿、嗜酒、喜歌舞，故作此神，著純白之衣，潔淨無垢。
- (31) 舍利弗復白佛言：云何如來，告天帝釋及四天大王云：我不久滅度，汝等各於方土護持我法？我去世後，摩訶迦葉、賓頭盧、君徒般歎、羅[目*侯]羅四大比丘，住不泥洹，流通我法？
- (32) 佛言：但像教之時，信根微薄，雖發信心不能堅固，不能感致諸佛弟子，雖專到累年，不如佛在世時，一念之善，其極慊至，無復二向，汝爲證信，隨事厚薄，爲現佛像、僧像，若空中言，若作光明，乃至夢想，令其堅固，彌勒下生聽汝泥洹。
- (33) 舍利弗復白佛言：如來現世二十年前，度諸弟子無有常施，隨有便施，自二十年後，施多定物，是義云何？
- (34) 佛言：有長者子，名曰分若多羅，宿有善根，生婆羅門家，樂欲捨家修無上道，隨大目犍連，於巴連弗邑天王精舍，求受具戒。目連語云：汝可七日七夜悔汝先罪皆使清淨，無諸妨障者，我當爲汝從僧中乞。

分若多羅言：云何得知妨障已滅，云何得知我受得戒？仰願諸佛，加我威神，令我罪滅得見得戒之相。

佛言：汝但勤誠，誠至自見。

分若白佛：謹奉尊教。

懇惻日夜到第五夕，於其室中雨種種物，若巾若帔、若拂若帚、若刀若斧、若錐若鏟，次第分別墮其目前。

分若多羅生歡喜心，生得果心。滿七日已，具白目連。

目連問我，我語之曰：是離塵相，拂割之物也當以嚙師，師其緣也。夫受戒者，隨其力辦，可以爲施，不限於此，不必備此。

(35) 舍利弗復白佛言：世尊！有諸檀越造僧伽藍，厚置資給供來世僧有似出家僧，非時就典食僧，索食而食，與者食者得何等罪？其本檀越得何等福？

(36) 佛言：非時食者，是破戒人，是犯盜人。非時與者，亦破戒人，亦犯盜人。盜檀越物是不與取，非施主意施主無福，以失物故，猶有發心置立之善。

(37) 舍利弗言：時受時食，食不盡者非時復食，或有時受至非時食，復得福不？

(38) 佛言：時食淨者，是即福田，是即出家，是即僧伽，是即天人良友，是即天人導師。其不淨者，猶爲破戒，是大劫盜，是即餓鬼，爲罪窟宅。非時索者，以時非時，非時輒與，是典食者，是名退道，是名惡魔，是名三惡道，是名破器，是癩病人，壞善果故，偷乞自活，是故諸婆羅門，不非時食。外道梵志亦不邪食，況我弟子知法行法，而當爾耶？凡如此者非我弟子，是盜我法利，著無法人，盜名盜食，非法之人，盜與盜受，一團一撮片鹽片酢，死墮焦腸地獄，吞熱鐵丸，從地獄出生豬狗中，食諸不淨，又生惡鳥，人怪其聲，後生餓鬼，還伽藍中處，都園內噉食糞穢，並百千萬歲，更生人中貧窮下賤，人所棄惡，所可言說人不信用，不如盜一人物其罪尙輕，割奪多人故良福田故，斷絕出世道故。

(39) 舍利弗復白佛言：如來宗親多有出家，爲自發心，爲佛神力耶？

(40) 佛言：諸釋憍慢著樂，何能願樂？特是父王宣勒：宗室生二子者，一人隨我，阿那律久積善根深樂正法，攜率釋子跋提難提、金毘羅、難陀、跋難陀、阿難陀、提婆達多、優波離，澡浴清淨來至我所，欲求出家。

時有上座名毘羅茶，別度阿難陀、難陀。

次一上座名婆修羅，別度提婆達多、跋難陀。

唯阿難修不忘禪，宿習總持，於少時中得佛覺三昧，積百萬川水，攬以爲雨，雨水奔流入于大海，阿難手從海中取以分別色味，不雜，還置本源，無有漏失。

(41) 文殊師利白佛言：世尊！舍利弗者，如來常言其於聲聞中智慧第

一，不謂小心能問要義？

(42) 佛言：其久種明悟，發揚我法，以諸慧利利眾生故。

(43) 云何如來說父母恩大不可不報？又言：師僧之恩不可稱量，其誰為最？

(44) 佛言：夫在家者，孝事父母，在於膝下，莫以報生長與之等，以生育恩深，故言大也。若從師學開發知見，次恩大也。

夫出家者，捨其父母生死之家，入法門中受微妙法，師之力也。生長法身，出功德財，養智慧命，功莫大也。追其所生乃次之耳。

(45) 又言：當何名斯經？

(46) 佛言：當名《菩薩問喻》，以廣大故，又名《舍利弗問》。

(47) 爾時，四眾聞說是已，五十新學比丘信根成立，法眼清淨，舊德天人八部等皆大歡喜，作禮而去。